

## REGIONAL NEWS

HEADLINES:-

1. Vawwin khan Mizoram pumah sorkar buatsaihin Green Mizoram Day uar taka hman a ni.
2. Mizoram IGP Pu Lalbiakthanga Kiangte chuan ramchhunga hman tur criminal law duan thar pathum te chu Mizorama hman a nih vat theihna'n theihtawp an chhuah thu a sawi.
3. Union Cabinet chuan Pradhan Mantri Awas Yojana hnuaiah thingtlang leh khawpuiah chenna in vaibelchhe thum sak belh leh a remti.
4. University Grant Commission (UGC) chuan College leh University chu kum khatah admission tum hnih tih a phal.

&lt;&gt;&lt;&gt;&lt;&gt;

GREEN MIZORAM DAY

Mizoram pumah vawiin hian ramngaw humhalh pawimawh zia inzirtirna Green Mizoram Day pualin thingphun hnatlangpui neih a ni a, Governor Dr. Hari Babu Kambhampati-a leh a nupui Lady Governor Dr Jayashree Kambhampati ten Circular Lawn, Raj Bhavan-ah Herhse tiak an phun a, Governor hian Ramngaw chereu nasa chak lutuk avanga sik leh sa danglam mek avanga chhiatna lian tak tak thleng chho mekah hian khua leh tui ten ramngaw humhalh pawimawh zia leh ramngaw siam tura tan lak a pawimawh zia an hriat thar a tul a ti a. Ramngaw chereu in a nghawng tuihna tlem tial tial te, khawlum leh nungcha a nghawng dan te hre tharin a siamthat hna thawh kawngah khua leh tui ten kan mawhphurhna kan hriatthar leh a tul a ni a ti.

Mizoram ni pawimawh Green Mizoram Day-ah hian Mizoram chung district hrang hrangah hun hman a ni a, kumin thupuih 'I nunna atan thing phun rawh' tih hman a ni.

Art & Culture Minister Pu C. Lalsawivunga chuan Aizawl Beraw Tlang Multipurpose Cultural Complex Auditorium a Green Mizoram puala inkhawm buatsaih a hmanpui a, ramngaw leh tui hna chereu zelna chhan-ah Mizote lo neih dan chu en chian a tul thu a sawi a, Green India Mission hnuaih ramngaw humhalh leh siam pun lamah tan rual a ngaih thu sawiin nungcha tawlh ruk manchhuah kawngah pawh sorkar leh mipuite tanrual a ngaih thu a sawi.

He hunah hian Ram kang ven kawnga District ti tha thlanhhuah te hnenah lawmman sem a ni a, 1-na Kolasib District an ni a, 2-na Lawngtlai District a ni a, 3-na Mamit District an ni a, hei bakah hian Aizawl District chhunga ram kang veng tha ber khua chu Lamchhip niin Kepran khua chu pahnihna an ni a, Seling khua-in lawman pathumna an la bawk.

Vawiin Green Mizoram Day hi Mizoram District hrang hrangah hman niin Lungleiah chuan Lunglei TNT hmunah inkhawm buatsaih a ni a, he hun hi Health Minister Pi Lalrinpuiin a hmanpui a, TNT Hrangchalkawn leh Thualthu inkar bakah NH 54 Lunglei leh Lawngtlai inkar kawngpui dungah sorkar deptt hrang hrang a thawktu te leh tlawmngai pawl hrang hrangten thing tiak thahnem tak an phun a ni.

Serchhipah pawh DC Conference Hall-ah hemi ni pual hian inkhawm buatsaih a ni a, Bawrsap Pu David Lalthantluanga chuan Green Mizoram Day hman chhan a sawi bakah, thil nung zawng zawngte chu dam khawchhuak tura kan inmamawh tawn theuh an nih avanga environment humhalh pawimawhzia zirchhuah a nunpui a tul thu a sawi.

Kolasib District Level Green Mizoram Day Committee buatsaih a 1st IR Bn Hqrs., Mualvum-a Green Mizoram Day puala inkhawm tawi neihah Mizoram Assembly Deputy Speaker Pu Lalfamkima chuan thiamna a san zel laiin thing leh mau humhalhna kawngah Mizoram chu a tlahniam zel ni a a hriat thu a sawi a, Green Mizoram Day puala thing leh mau phunte a puitlin theih nan mahni zawnah theuhva theitawp chhuah turin kalkhawmte a chah bawk.

Champhai Zotlanga Mangkhaia Hall-a Green Mizoram Day puala inkhawm tawi buatsaihah, khuallain Adviser to CM (Technical) Er. H.Ginzalala chuan boruak tichhe thei ang chi reng rengte hman tlem deuh deuh a pawimawh thu sawiin, hemi kawngah hian ngaihtuahna sen tlan a tul hle a ni, a ti.

Green Mizoram Day puala Khawzawl DC Conference Hall-a inkhawm tawi neihah Khawzawl bawrsap Pu Lalfakzuala chuan thangthar lo la awm zel turte tan a thingphun a pawimawh zia sawiin Khawzawl leh camphai inkar lamlian bakah Tuimuk lui kamahte thingphun hnatlang an nei.

Saitual Bawrsap chenna tuala Green Mizoram Day puala inkawm tawi neihah, bawrsap Dr Lalngura Tlau chuan, hmasawna leh thing leh mau, nungchate humhalh chu in dal tawn lova kal kawp tir a pawimawh thu a sawi a, vawiin a thingphun takte chu a enkawl zui lam thlahthlam lo turin kalkhawmte a ngen bawk.

Nagar Van Yojona, Mamit-a Green Mizoram day puala inkhawm tawi buatsaihah Pu VL Remliana, Mamit Bawrsap chuan tu leh fate tana chenna tlak ram siam tura thingphun uar deuh deuh a pawimawh thu sawiin hemi hnu hian Mamit-a JNV Campus-ah thingtiak phun a nih bakah nikum Green Mizoram Day-a Darlak Road-a thingtiak phunte sam faia hnatlang neih zui nghal a ni bawk.

Vawkpui Lutar Hnahthiala Green Mizoram day puala hun hmanna-ah District Bawrsap Pu Chuahnuana chuan thing leh mau tih che reu avanga khua in lum lam a pan zel chu thil runthlak tak a nih thu sawiin ram nuam leh mawi siam tura thing leh maute duat taka enkawl zui theuh turin kalkhawmte a sawm bawk.

Lawngtlai Bawrsap pisa tuala Green Mizoram Day puala inkhawm tawi buatsaihah kBawrsap Pi B. Malsawmtluangi chuan Mizoram boruak sik leh sa nuam tak chu ramngaw tih chereu nasat a nih avanga a inthlak danglam chak hle thu sawiin Mizorama lo neih dan leh kangmei chhuak thin chu ramngaw ti chereu chak ber tu a nih thu a sawi . Green Mizoram Day pual hian Lawngtlai atanga kilometre 14 a Kaladan Multi Modal Transit Transport Project lamlian sirah thing tiak thahnem tak phun a ni bawk.

Siaha District Council Forest Conference Hall-a Green Mizoram day puala hun hmanna-ah khuallian MADDC CEM Pu M. Laikhaw chuan Green Mizoram Day pual chauh ni lova mihringte dam khawchhuah nana thingphun uar zel turin kalkhawmte a ngen a, Siaha District chhunga Tisopi khaw panna leh Tipi Ferry panna kawngahte thing tiak phun a ni bawk.

## ASSEMBLY SPEAKER STATEMENT :

Mizoram Legislative Assembly Speaker Pu Lalbiakzama chuan Speaker Bungalow kawt a thingkung chu mihring tana a him loh avanga kih a nih thu a sawi.

He thu hi vawiina Green Mizoram day hmanna, Berawtlang Aizawl-a Multipurpose Cultural Complex Auditorium neih a hmanpui na-ah sawiin Speaker chuan Mizoram Speaker bungalow chu PWD enkawl a nih thu leh PWD lamin uluk taka an en hnuah an thing kih tak chuan Speaker Bungalow compound-a lungrem chu a ti khi tih hmuh a ni a, Mizoram chung hmun hrang hrang a chhiatna a thlen hluar lai a enfiah a nih angin thing kung hian mihring tana chhiatna thlen mai a hlauhawm avanga kih a ni a ti.

<><><>

### IGP

Mizoram IGP Pu Lalbiakthanga Khiangte chuan ramchunga hman tur hnuchhuina atana dan zam thar criminal law pathum te chu Mizorama hman a nih vat theihna'n theihtawp an chhuah thu a sawi.

Pu Lalbiakthanga Khiangte chuan criminal law pathum sorkar laipuiin a duan tharte chu July ni 1 atanga Mizoram Police ten an hman ve theihnan nasa taka an inbuatsaih thu a sawi a, Mizoram Police-te training pe turin NCRB atanga trainer an chah chhuah thu leh District hrang hranga Police Officer-te chu training an lo pek lawk tawh thu leh training pe thei tur mi 100 chuang an neih tawh thu a sawi a, Mizoram Police za a 80 te chu Criminal Law duan thar chungchangah training an in pek vek tawh thu a sawi.

Heng dan thar hnuaih hian Criminal Crime Tracking Network System leh prosecution, court leh prison bakah police ten case thlen chin an hriat zung zunga an inthlunzawm theihna atan Inter Operable Criminal Justice System buatsaih a nih thu a sawi a, hengte hi Mizoram Police Station zawng zawngah vuah vek a nih tawh thu sawiin pawikawihna lian thlenna hmun pawh video hmanga chhinchhiah vek a ngaih tawh thu a sawi a, hemi atan hian videographer ni turin Mizoram Police mi leh sa 257 te chu zirtirna pek an nih tawh thu a sawi bawk.

Inspector General of Police chuan dan thar hnuaih FIR pawh online hmanga thawn leh dawn theih a nih tawh tur thu sawiin online a case register thei tur Mizoram District 11 atangin Police 148-te zirtirna an pek tawh thu a sawi a.

Pu Lalbiakthanga Khiangte chuan Forensic Evidence Police ten an lak thiamna hun atan Sorkar laipuiin India ram state tin a Police-te kum nga chung hun a pek thu a sawi a, Mobile Forensic Vehicle pawh Mizoram District tina dah an tum thu sawiin tun dinhmunah District pali-ah Mobile Forensic Vehicle-a awm sa thu a sawi a, Forensic science laboratory lam pawhin tun thla chhungin mobile forensic vehicle 10 pekchhuah an tum thu a sawi bakah training pek kawngah pawh Mizoram forensic Science Laboratory te nen thawh ho an tum thu a sawi.

<><><>

### PMAy

Union Cabinet chuan Pradhan Mantri Awas Yojana hnuaiah thingtlang leh khawpuiah chenna in vaibelchhe thum sak belh leh a remti. Nimin tlaia NDA sawrkar thara Union Cabinet thukhawm hmasa ber chuan hei hi a remti a ni.

Sawrkar laipui chuan Pradhan Mantri Awas Yojana hi kum 2015 atang khan a kalpui a. Thingtlang leh khawpuiah chenna in nei lote tan insak tanpuina a pe a. He scheme hnuaiah hian chenna in vaibelchhe li leh nuai 21 chuang kum 10 chhungin mi rethei tan sak tawh a ni.

<><><>

### UGC

University Grant Commission (UGC) chuan College leh University chu kum khatah admission tum hnih tih a phal. He kalphung thar hi kumthar academic session atanga hman tan tur a ni a. Tun dinhmunah UGC hnuaiah hian zirna in sangah te kum khatah admission vawi khat chauh a tih theih a.

UGC Chairman Professor Mamidala Jagadesh Kumar chuan he policy thar hi zirlai tam takin an chhawr dawn tih sawiin board result puan tlai avangte, damloh avangte leh mimal harsatna avanga a hun taka admission ti ve hman lo tan pawh tih lehna hun a inhawng dawn a ni a ti.

Admission ti ve hman lo tan kum khat chung tawp nghah a ngaih tawh dawnloh avangin phurna tam tak a pe ang a ti.

<><><>

### MALAWI VP PLANE MISSING

Malawi Vice President Saulos Chilima chuanna thlawhtheihna chin hriatlohin a bo.

Thudawn danin he thlawhnaah hian Malawi Vice President Chilima bakah hian midang pakua an chuang a. President Lazarus Chakwera office thuchhuah danin thlawhna bo hi Malawi Defence Force te thlawhna niin nimin khan an khawpiu Lilongwe atanga thlawk chhuak a ni a. He thlawhnaa hian kum 51 a upa Vice President Chilima bakah hian a nupui leh midang pariat an chuang a. Nimina a thlawhchhuah atanga minute 45 hnua Mzuzu International Airport-a tum tura ruahman chu a chin hriatlohin a awm zui a. Thlawhna zawn hna hi ngawrh taka thawh nghal a ni.

<><><>